

Balu<sup>u</sup> na bini  
 gba  
 Piele  
 Eli na kalan<sup>u</sup>

Piele aye nani balu<sup>u</sup> na bini gba e pi omakilisito inde u a'i o li bili inde me okpála inde nani li Ebhe abhu<sup>u</sup> o. Okpála ang-o atsambala nani bhú<sup>u</sup> Adji Minele, ali pápá na abebe. Engú<sup>u</sup> na ngbéngbé inde bhú<sup>u</sup> balu<sup>u</sup> inde-e, a ko nato masi bhú<sup>u</sup> okpála inde ngatatanga. Padhá de, anga u adu<sup>u</sup> nani ato mbolo li uo, kabula nabhuka gba o-o. Ani aye balu<sup>u</sup> ang-o ngubula naha Bádha Ngali gba Yesu Kilisito pi uo, inde nakpi, ne nazuku gba e ngaha pi okpála na'o 'to o 'to engú<sup>u</sup> inde ani apa me ni améne e nedhinga nago ka ni ko. Nau ongú<sup>u</sup> bhomu<sup>u</sup>-o, uo ne kpadji koko ade, a ayo bha me u ziba nakibila olíkabhu ne nambila ndjindji me, a ko nale inde u ngale uo ne e bhú<sup>u</sup> nabhuka gba uo na kuku<sup>u</sup>-o. A ko la di me, u asía makalá li 'kpí inde li Yesu Kilisito ago lie (1:7).

Bhú<sup>u</sup> nato masi inde li Piele ato e bhú<sup>u</sup> okpála bhú<sup>u</sup> nedhinga na líkabhu-o, ani aha di líli pi okpála inde ngatanga balu<sup>u</sup> inde me: u kobho maka okpála gba Kilisito.

Ongbengbe ongú<sup>u</sup> inde bhú<sup>u</sup> bhuku inde-e ngae inde:

Eli na kalan<sup>u</sup> 1:1-2

Nagama matá 'ngú<sup>u</sup> ne toto pindji mukobho inde li Ebhe ngaha e 1:3-12

Líli pindji mukobho na bubu 1:13 - 2:10

Ongú<sup>u</sup> inde a ayo me makilisito mene e bhú<sup>u</sup> nedhinga na líkabhu 2:11 - 4:19

Namene kulu ne nak<sup>o</sup> li o ne kuto ka makilisito 5:1-11

## Eli na soso 5:12-14

*Piele yi omabhuka* inde agbongbolo ne bìlì-e mayi

<sup>1</sup> Ma aye baluá inde-e pì yi ngama Piele, ma ne bhulu titima gba YesuKilisito . Ma aye pì yi okpála inde lì Ebhe abhu o, ngayi okpála inde ngadu maka ogandji okpála bhú kuti koko, ngayi inde atsambala bhú ondu doto na Pote, ne Galatia, ne Kapadose, ne Adjia di ne Bitinia-o. <sup>2</sup> Ebhe 'Dyi ní abhu nani yi bhutode maka ani aleke nani engú ang-o lie-o. Ani alo yi lì kpadji gba Bu Bhobua , ani a'o yi kpi ngú nadu piga gba e, ngubula me yi du namanga Yesu Kilisito, amba ngute ani vulu yi ngú nadu bubu kala ni. A ayo me bádha bhú 'bu gba Ebhe-e du ne yi, amba ani ha di guo 'ngú pì yi ane mane.

*Piele adhөгө* Ebhe, anga ani akóbho omabhuka makobho

<sup>3</sup> A ayo me ní dhөгө Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pì ní bedhe, ani atsia aha mukobho na mbia pì ní bhú nazuku Yesu Kilisito bhú ká okpála inde amu-o. Kaka-a, ní abhele djila ní lì ani me ní azúku di mazuku. <sup>4</sup> Ní ti la di da na'o 'to ní 'to tia inde lì Ebhe awo e pì ní opiga gba e-o. Ani awo tia ang-o pì ní abhúlá. Tia ang-o zizi de, a sisiti de, a pádha la di-i de. <sup>5</sup> Nganí okpála inde abhuka Ebhe-e, ani ngalila ní ne angu gba e, ngubula me ní sia mukobho na duduma ang-o. Mukobho ang-o asúno lie lì sokpí.

<sup>6</sup> Ka ongu ang-o, yi kpi djali, abana ayo lie me yi zu olikabhu mbia inde-e lì okpadji ngangá ngú nedhinga bedi-o. <sup>7</sup> Belegu olo inde asisiti masiti-e, okpála tsutsulu ngaiza bhú djua ngú naleleke me a kolo ndjindji. A si la masi maka nabhuka gba yi-e ane olo lie mane-e? Yi ngazu olikabhu bhomu-o ngubula me okpála mbila me a

li nabhuka gba yi-e ne tata. A bhadi moko ne nabhuka gba yi-o. Ebhe améne mo-o ngu namene me, kabula nabhuka gba yi-e, ani toko yi, ani dhogò di yi, ani mene di me 'li yi kolo ngbéngbé li 'kpí li Yesu Kilisito asúno lie lie bhú sangu gba e-o. <sup>8</sup> Belegu yi u ani lie de-e, yi ne mukunda pi ani. Abana yi nde lie ngau ani ade-e, yi ngabhuka ani. Kaka-a, yi ngakpi djali naali, djali inde li kpála ti da nakpokpo lele e de, <sup>9</sup> anga yi asía makalá na nabhuka gba yi-e masia. Makalá ang-o, a ko li bua yi akóbho lie-o.

<sup>10</sup> Nani kalanu-o, opolofeta agili má bhotobhoto me o mbila kpadji li Ebhe akóbho okpála lie-o. U adu akpokpo 'ngu kalanu pi okpála pindji bádha bhú 'bu inde li Ebhe a'o nani e pi yi-o. <sup>11</sup> Bua gba Kilisito inde adu bhú uo-o apa pi uo kalanu me, Kilisito azú likabhu. Pipita-a, ani tsia sía sangu gba Ebhe-o. Opolofeta ang-o agili nambila me ongu bhomu-o akódho 'kpí nadho. U atsia agili di nambila me a adú lele pi. <sup>12</sup> Ebhe atsia asuno pi opolofeta bhomu-o me ongu ang-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo Bádha Ngali-e , akpokpo ongu bhomu-o pi yi akpokpo. U akpokpo pi yi ne angu gba Bu Bhobua inde li Ebhe atima e-o. Belegu oandjelu , u akunda nau ongu ang-o.

*Piele apa pi omabhuka me u du bubu kala Ebhe*

<sup>13</sup> Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde li Ebhe ahá e pi yi li 'kpí li Yesu Kilisito asúno lie lie bhú sangu gba e-o. <sup>14</sup> Yi manga Ebhe maka ongisi na babadha. Yi akpáta matá kpadji na sisiti inde nani yi adu nakpata e kala me yi nde mbila Yesu Kilisito de-e de. <sup>15</sup> Engú bini, yi du bubu bhú mukobho gba yi-e libhomu, maka li Ebhe inde a'i yi-e nde

lie bubu-o. <sup>16</sup> Padhá de, anga u aye bhú Bhuku gba Ebhe-e me: «Yi du bubu, anga ma bubu.†»

<sup>17</sup> Nedhinga yi ngayo Ebhe lie, yi nga'i ani me «'Dyi ní». Padhá de, anga ani ngakodho 'ngú gba okpála nakpata lele kulu gba kpála ne kpála. Ani tsia la di bhúla kpála bini de. Kaka-a, nedhinga yi nde nga bha lie píla doto-o, yi manga ani bhú ndu 'ngú hana inde yi ngamene e-o. <sup>18</sup> Yi mbila ndjindji maka li Ebhe agbegbe yi lie li kpadji ndu ongu hana na padhá padhá inde li odyi yi apana e pi yi-o. Ebhe kala yi ne ehe inde ngasiti masiti maka aladja, i du di-e olo de. <sup>19</sup> Engú bini, ani akala yi ne ngute Kilisito inde ane ndu 'he hana-o. Kilisito maka ndili kandole inde aha mukobho gba e, u atsia abhole e-o. Ani bubu kala Ebhe, ehe na sisiti bhú ani belegu ade bini. <sup>20</sup> Ebhe abhu nani ani ngu nakpi li 'ngú gba okpála kala me ani bho doto, la mbia inde-e, ani atsia asuno ani bhú onedhinga na soso inde-e mbamba ngubula me ani kobho yi. <sup>21</sup> Kabula Kilisito-o, yi abhuka Ebhe inde azuku ani bhú ka okpála inde amu-o, ani atsia aha sangu pi ani. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to ani.

<sup>22</sup> Yi avulu bua yi avulu ngu nadu ne mukunda na kukulu sunda yi. Yi avulu bua yi ango-o li kpadji nakpata ongu na kukulu inde li Ebhe asuno e pi yi-o. Ka 'ngu ango-o, ma apa pi yi me, yi du ndu 'kpí hana ne mukunda na kukulu sunda yi di ne bádha bua. <sup>23</sup> Yi mbila ndjindji me Ebhe aha mukobho na mbia pi yi li kpadji na eli gba e na duduma, inde di ngaha mukobho pi okpála-o. Ebhe inde i kpikpi de-e aha mukobho ango-o pi yi ngae makpe. Yi sia mukobho ango-o ka odyi yi inde

† 1:16 1:16 Tsia bhú Lev. 19:2.

amú mamu-o de. <sup>24</sup> Padhá de, anga u aye bhú Bhuku gba Ebhe-e me:

«Ndu okpála hana ngamu maka ulu a'u'u'u lie-o.

Bádha gba kpála-kuti ngandjia maka bádha gba felele andjindjia lie,

i du me a nde anuku-o.

<sup>25</sup> Engú bini, eli gba Ngámá-a ngadu duduma ne duduma.†»

Eli ango-o, a ko Bádha Ngali inde u akpokpo e pi yi-o.

## 2

*Piele apa me omabhuka du* maka teme na mukobho

<sup>1</sup> Yi bala ndu sisiti 'ngú hana kabula mukobho na mbia inde li Ebhe aha e pi yi-o. Yi apite kpála bini de, yi adú amene engú na kali de, yi adú ne gumu 'he gba kpála de, yi adú di apa 'ngú li okpála koko sisiti de. <sup>2</sup> Yi du maka ongisi u azu o na mbia, inde ndu 'kpí hana ne gumu nandji 'ka. Yi du bhadi ne gumu Eli gba Ebhe-e moko ngubula me yi bhele, akólo li ekpí li Ebhe akóbho yi lie libhomu-o. <sup>3</sup> Yi du bha ne gumu eli ango-o na paká paká, anga yi ambila bádha 'ngú inde li Ngámá ngaha e li bua yi ambila.

<sup>4</sup> Yi dyudyo liyi de Ngámá Yesu Kilisito masikpe, a ko teme na mukobho, inde li okpála abhike nani e ne 'ili me a li kulu ade-o. La-a, bhú djila Ebhe inde alo nani teme ango-o, ani atsia au me a li kulu ane ndu oteme koko hana. <sup>5</sup> Ngayi makpe-e di-e, yi du maka teme inde na mukobho, amba Ebhe ha yi, ani tsia yiki eti gba Bu Bhobua ne yi maka 'ngbé 'ti Ebhe gba omaYuda-o. Bhú 'ti ango-o, yi akólo piga gba odimandø inde aha lio pi Ebhe, ngubula naha makiso na Bu Bhobua, inde ndjindji

† 1:25 1:25 Tsia bhú Isa. 40:6-8.

pi Ebhe li kpadji gba Yesu Kilisito. <sup>6</sup> Padhá de, anga u aye bhú Bhuku gba Ebhe-e me:

«Yi gbo nga 'dje yi, ma alo teme bini na mase,  
ma a'ó bhú gudhu na Siona  
maka teme inde abi eti-e libhomu.

Kpála inde azíba teme ang-o sía numu belegu de bini.†»

<sup>7</sup> Pi yi okpála inde abhuka-a, teme ang-o pi yi li kulu ane ndu oteme koko hana. Engú bini, pi okpála bhende i bhuka de-e, a mo-o ade. Padhá de, anga u aye bhú Bhuku gba Ebhe-e me:

«Teme inde li okpála nayiki eti-e abhike e-e,  
akolo teme inde abi eti-e libhomu ngae.†»

<sup>8</sup> U aye matá di bhú Bhuku gba Ebhe-e me:

«Okpála ngado 'dhu o li teme ang-o,  
i tsia méne me u gu 'i o kuto.†»

U ngado 'dhu o tété, anga u ayala nakpata 'li Ebhe, Ebhe apa nani bhutode me a méne lie mo-o.

<sup>9</sup> La pi yi-e, yi ne piga inde li Ebhe abhu o-o. Yi ne piga gba odimandé inde ngamene kulu pi 'ngbé Ngámá Ebhe. Yi ne piga okpála inde li Ebhe a'o o kpi pi e. Aní abhu yi ngubula me yi kpokpo ongbengbe 'ngú inde ni amene e pi okpála. Aní a 'i yi me yi ze bhú biti, amba yi go li zi 'ke gba ni inde ngatsi ane ndu 'he hana-o. <sup>10</sup> Nani kalanu-o, yi du ne okpála gba Ebhe de, engú bini mbia inde-e, yi akolo okpála gba aní. Nani kalanu-o, yi sia ndjinga gba Ebhe-e de, engú bini mbia inde-e, yi asia ndjinga gba aní asia.

*Piele aha* líli pi omabhuka pindji lele namanga lio, di ne namanga Ebhe

† 2:6 2:6 Tsia bhú Isa. 28:16. † 2:7 2:7 Tsia bhú Ets. 118:22.

† 2:8 2:8 Tsia bhú Isa. 8:14.

<sup>11</sup> Ondaise ma na mukunda, yi mbila ndjindji me yi pila doto ei ne ogomago. Kuti gba yi-e pila doto inde e ade. Kaka-a, ma ayo ka yi me, yi adu amene osisiti 'ngu li gumu e nde li bua yi-e de, anga ongu bhomu- o ngazu bili li bhobua yi ngae. <sup>12</sup> Yi mene ehe liyi bhú ka ompagano ndjindji ngubula me, abana u du apa 'ngu li yi sisiti-e, u de u obabadha 'ngu inde yi ngamene e-o, amba ekpi li Ebhe asuno lie pi uo lie, u de dhogo ani.

<sup>13</sup> Yi ke liyi ne kuto kala ndu okpala hana inde ngau pila doto, kabula Ngama gba ni Yesu Kilisito inde yi ngakpata nganda e-o. Yi ke liyi ne kuto kala ongbengbe ongamasí na doto inde ngau pi ndu okpala hana-o. <sup>14</sup> Yi ke liyi ne kuto kala oguvelenele inde li 'ngbe ngama a'o o-o. Ani a'o uo ngubula me u mene okpala inde ngamene siti 'ngu-o kpekpeke, di ne me u dhogo obhende ngamene badha 'ngu-o. <sup>15</sup> Padha de, anga Ebhe akunda me yi gbite 'bhe ngingi 'ngu gba okpala inde ayala nambila Ebhe-e ne namene badha 'ngu. <sup>16</sup> Yi mene ehe liyi maka okpala inde bhú bali ade. Engu bini, yi apa de me, o nde lie bhú bali ade-e, o mene siti 'ngu bhú gandji-e de. Yi mene mangbo liyi maka obalise gba Ebhe. <sup>17</sup> Yi manga ndu okpala hana. Yi du ne mukunda pi ondaise yi bhú 'bu nabhuka . Yi manga ongbengbe ongamasí mamanga. Yi dhogo Ebhe.

<sup>18</sup> Ngayi obalise-e, yi ke liyi kala omakulasi yi ne kuto. Yi manga uo ndjindji. Yi amanga bha bini obhende na bhuku 'ngu-o de, inde ngamene yi ndjindji-e de, yi manga di obhende ngamene yi sisiti-o. <sup>19</sup> Padha de, anga Ebhe ngasuno badha bhú 'bu pi kpala inde ngazu likabhu sakpa okpala koko padha me ani nde mene siti 'ngu de, li ani tsia kibila likabhu ang-o kabula 'li Ebhe. <sup>20</sup> Yi du azu bhikpa ka siti 'ngu yi amene e, a dhogo yi teté da? Engu

bini, i **du** me yi nde ngazu likabhu sakpa okpála koko kabula bádha 'ngú inde yi amene e, li yi kibila likabhu ango-o, a ko bádha 'ngú bhú djila Ebhe. <sup>21</sup> Aní a'í yi me yi mene moko, anga Kilisito azu bhadi likabhu pí yi moko. Aní apana kpadji pí yi, amba yi mene bhadi maka ni.

<sup>22</sup> Ngaani-e, aní mene siti 'ngú de.

Aní pa eu belegu de bini.†

<sup>23</sup> Li okpála asobho aní lie, aní gie sobho pí uo de.

Abana u ato mbolo li aní lie, aní gu okpála ango-o de.

Aní a'o mangbo lie sakpa Ebhe inde ngakodho 'ngú ngbingbili-o.

<sup>24</sup> Aní abha sisiti 'ngú gba ní-e, aní atsia abi li kute e.

Aní abi siti 'ngú ango-o nedhinga u abholo aní lie li kulusi ngubula me,

ní **du** maka okpála inde amu li pápá na siti 'ngú amu, di ne me ní **du** mangbo bhú mukobho inde ngbingbili.

Yi akobho ka oeka li aní abi e-o.

<sup>25</sup> Padhá de, anga yi **du** nani maka okandole inde angita.

Engú bini, mbia inde-e, yi agie liyi agba mulila, inde ngalila bua yi-o.

### 3

*Lele dasundu sunda olisi ne obhosi*

<sup>1</sup> Ma ngapa di pí yi olisi moko, yi kə liyi kala obhosi gba yi-e ne kuto da napa me abana li bini bini bhú ká uo bhuka 'li Ebhe de-e, u de dji bua o ka nau lele mukobho gba yi, abana yi pa 'ngú pí uo pindji eli gba Ebhe-e de-e, <sup>2</sup> u de bhuka kabula nau me lele dasundu gba yi-e ndjindji, yi la di ngamanga uo. <sup>3</sup> Yi adú bha bini aleke kute yi akilidjo

† 2:22 2:22 Tsia bhú Isa. 53:9.



de, abana i **du** **bhú** **napulú** sundjo yi, abana i **du** nadyi omagege na olo, abana i **du** di-e **bhú** nadyi obongo bhe na mase naali. <sup>4</sup> Engú bini, yi leke mangbo liyi **bhú** naleke bua yi. Yi **kə** liyi ne kuto, yi **du** di ne guo 'ngú . Padhá de, anga a **bhomu**-o bádha bhe i zizi de-o, a nganga li Ebhe naali. <sup>5</sup> Olisi na kalanu inde adu akpata Ebhe-e, inde adu di na'o 'to o 'to ani-e, adu nani aleke lio ne ngua bádha kulu **bhomu**. U adu la di namene líli gba obhosi gba o-o. <sup>6</sup> Yi bhundja nga pindji Sala. Ani adu amene nani líli gba 'ko e Abalahama ndjindji. Ani adu a'i ani me ngamá gba ni. Yi ne ongisi na olisilisi gba Sala na paká paká, i **du** me yi nde ngamene bádha 'ngú, yi nde 'o la di de me tsulu ha angu yi de-o.

<sup>7</sup> A bhadi moko pi yi obhosi, a ayo me dasundu gba yi ne olisi gba yi-e **du** ndjindji. Yi mbila ndjindji me uo **bhubhuku** ane yi. Yi manga uo mamanga, anga mukobho inde li Ebhe ahá e pi yi **bhú** bádha **bhú** 'bu gba e-e, ani ahá pi ndu yi ne uo hana. Yi mene mo-o, ehe bini ní kpadji kala mayo gba yi-e de.

*Lele dasundu* gba omabhuka

<sup>8</sup> Ngú nabu tata-a, yi **du** **ndu** yi hana ne bua bini, yi **du** amene bádha 'ngú li yi **sunda** yi, yi **du** ne **mukunda** **sunda** yi maka ondaise . Yi **du** ne ndjinga **sunda** yi, yi **kə** la di liyi **sunda** yi ne kuto. <sup>9</sup> Yi agie siti pi siti de, i **du** di-e sobho pi sobho de. Li kpála sobho yi-e, yi agie sobho pi ani de, engú bini, yi yo mangbo Ebhe me ani tuko bisagu pí ani. Padhá de, anga nedhinga li Ebhe a'i yi lie me yi **du** piga gba ni-e, ani apa nani pi yi me ni atúko bisagu pí yi. <sup>10</sup> A maka u aye lie **bhú** Bhuku gba Ebhe-e me: «Li kpála **kunda** me **mukobho** gba ni-e **du** ndjindji-e, ani **kunda** la di me ni **du** **bhú** djali-e, a ayo de me ani **du** apa siti 'ngú-o de,

a ayo la di de me aní du apa eu-o de.

<sup>11</sup> A ayo me aní dji 'ngbu e li siti 'ngú,  
aní mene mangbo bádha 'ngú.

Aní gili guo 'ngú ne kekele hana.

<sup>12</sup> Padhá de, anga Ngámá ne djila e li okpála inde ngamene  
ngbili 'ngú ,  
aní bedhe ngú nadjé mayo gba uo.

Engú bini, aní ngadji 'ngbu e li okpála bhende ngamene  
osisiti 'ngú-o.†»

*Piele apa me omabhuka kibila* likabhu me u nde ngamene  
bádha 'ngú

<sup>13</sup> I du me yi nde nga'o bua yi hana li namene bádha  
'ngú-o, a ko da inde améne yi sisiti-e? <sup>14</sup> Yi du ne djali  
nedhinga yi ngazu likabhu lie ka bádha 'ngú inde yi  
ngamene e-o. Ka 'ngú ango-o, yi adú ne tsulu okpála  
inde ngakunda namene yi sisiti-e de, bua yi abáka di-i de.  
<sup>15</sup> Yi dhogö mangbo Kilisito li bua yi maka Ngámá gba yi.  
Yi du bedhe ndu 'kpí hana ngú nakpokpo 'ta yi nga'o 'to  
yi lie 'to Kilisito pi okpála bhende ngayi yi tété-o. <sup>16</sup> Engú  
bini, yi kpokpo ne bhuku bua, amba yi manga la di uo  
mamanga. Yi mene ndu 'kpí hana engú inde yi au e li  
bua yi me a ndjindji-o, amba okpála bhende ngapa 'ngú  
li yi sisiti-e, sia numu nedhinga u ngasobho bádha kulu  
yi ngamene e kabula 'li Kilisito lie-o. <sup>17</sup> Padhá de, anga yi  
sia likabhu ka siti 'ngú inde yi ngamene e, engú tété ade.  
La-a, yi sia likabhu kabula bádha 'ngú inde yi ngamene e,  
i du me Ebhe nde aziba mo-o, bhobhomu-o ane ne bádha  
ngae.

<sup>18</sup> Padhá de, anga Kilisito adje di likabhu kabula siti  
'ngú gba ní-e bhutsibhutsi bini má ngbi! Ngaani kpála

† 3:12 3:10-12 Tsia bhú Ets. 34:13-17.

inde i mene siti 'ngú de-e, ani akpi ngubula nakobho ní okpála inde ngamene siti 'ngú-o, ngubula me ani mba bhúla ní agba Ebhe. Okpála abhòlò ani bhú kute, engú bini Ebhe atsia azuku ani li kpadji gba Bu Bhobua .

<sup>19</sup> Ka angu gba Bu Bhobua bhomu-o, ani atsia anu belegu di nakpokpo Bádha Ngali gba Ebhe-e pi obua inde amu inde bhú tikpu-o. <sup>20</sup> A ko bua okpála inde ayala nani nadi bua o nedhinga li Nuá adu abho 'ngbé zabu lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u du bhelé de. A adu bha nani okpála madjina padhá inde a'u'u nani bhú zabu-o. <sup>21</sup> Engu bhomu-o, a ko kulu batisimo. Ebhe ngakobho yi mbia inde-e li kpadji na batisimo bhomu. Batisimo ango-o ngubula na'e zibotu na kute ade, engú bini, a ngubula naha lio libhomu pi Ebhe ne bua nambila ngbili 'ngú. Ebhe ngakobho yi li kpadji na batisimo ango-o ka li Yesu Kilisito azuku lie-o. <sup>22</sup> Ani atapa abhúlá, ani adu de Ebhe li pápá na kokpa. Ani ngau pí 'ndji oandjelu di ne pí 'ndji ndu obua hana inde ne angu abhúlá oo-o.

#### 4

*A ayo me omabhuka mene engú* li lele mukobho na mbia

<sup>1</sup> Ní mbila ndjindji me Kilisito adje likabhu bhú kute. Kaka-a, ngayi di-e, yi du bedhe ngú likabhu maka ani. Padhá de, anga kpála inde adje likabhu bhú kute-e, a'o namene siti 'ngú a'o. <sup>2</sup> Nayie pi mbia inde-e, nedhinga hana inde yi améne e píla doto-o, a ayo me yi mene bhú mukobho gba yi-e engú inde li Ebhe akunda e-o. Yi améne engú na sisiti inde li bua yi ngakunda e de. <sup>3</sup> Padhá de, anga yi abala nako nedhinga gba yi-e bhelé bhú namene engú li omupagano amemene e-o. Yi améne matá mo-o de. Yi adu nani akunda olisi di ne

obhosi ngangá, gumu kute aha di nani angu yi maha. Yi adu abhələ kuo yi ne pandi, yi adu apo bhúla yi ngú nandji pandi, yi adu adho 'bi na sisiti. Yi adu di amene engú inde ayo la ndju nako de me yi mene e de-o, anga yi adu adhəgə oebhe na eu.

<sup>4</sup> La mbia inde-e, omupagano ngangamba, u la di ngasobho yi, anga yi kə matá nganda uo bhú siti 'ngú inde u ngamene e na mugwe mugwe-e de. <sup>5</sup> Engú bini, ekpí akólo makolo. Li 'kpí ango-o, u akpókpo 'ngú gba o-o kala Ebhe inde bedhe ngú nakodho 'ngú gba okpála inde uu, di ne okpála bhende amu-o. <sup>6</sup> Ka 'ngú ango-o, Kilisito anu nani belegu nakpokpo Bádha Ngali pi okpála inde amu-o. Ani akpokpo pi uo ngubula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata lele maka u adu nani lie píla doto, amba u du bhú mukobho maka Ebhe li kpadji gba Bu Bhobua .

*Piele apa me omabhuka mene kulu ne makalá u asia e ka Ebhe-o*

<sup>7</sup> Sokpí akolo masikpe. Kaka-a, yi du ne bádha mabhundja, yi bhulu djila yi, amba yi du nayo Ebhe. <sup>8</sup> Kala ndu 'ngú hana-a, yi du ne mukunda na paká paká sunda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. <sup>9</sup> Yi sia okpála inde ngago agba yi-e ndjindji. Yi asía uo ne nadi mutokono de. <sup>10</sup> A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi dú maka obabadha okpála inde ambila namene kulu ne makalá li Ebhe aha e pi yi kpi kpi kpi-o. <sup>11</sup> A ayo me kpála inde asia makalá nagama 'ngú-o, kpokpo oeli gba Ebhe-o . A ayo me kpála inde asia makalá namene kulu pi okpála koko-o, mene ne angu li Ebhe aha e pi ani-e hana, amba bhú

ndu 'ngú hana-a, okpála dhogò Ebhe ka Yesu Kilisito. Padhá de, anga ndu okpála hana ngadhogò Ebhe, ndu angu hana sakpa aní dudu ma ne dudu ma. A adu moko!

*Piele apa me omabhuka kibila* líkabhu ka 'lì Kilisito

<sup>12</sup> Ondaise ma na mukunda, yi angamba ka okpekpeke da 'ngú yi ngali bhú e de. Ongú bhomu-o ngakolo lí yi ngubula nambila lele nabhuka gba yi-e nde lie-o. Yi abhúndja de me a ko ongú koko kpi-e de. <sup>13</sup> Engú bini, yi kpi djali, anga yi ngabi bhomu-o té líkabhu inde lí Kilisito adje e, amba lí 'kpí aní asúno sangu gba e lie pí ndu okpála hana-a, yi de bedhe di ne djali na kuo kuo. <sup>14</sup> Yi du ne djali nedhinga lí okpála nde ngasobho yi lie kabula 'lì Kilisito-o. Padhá de, anga Bua na asasaua gba Ebhe-e ngadu bhú dabili bini ne yi. <sup>15</sup> I du me suka yi nde ngazu líkabhu-o, adú de me aní amene siti 'ngú-o de. A ayo di de me aní zu líkabhu anga aní abhòò kpála de, ne me aní azi 'he-e de, i du di-e me aní ali bhú 'ngú gba kpála koko-o de. <sup>16</sup> Engú bini, i du me kpála nde ngadje líkabhu anga a ko makilisito-o, a ayo de me aní dje numu tété-e de. Aní gie mangbo heni pí Ebhe, anga a ko kpála ka Kilisito.

<sup>17</sup> Nedhinga akolo, nedhinga inde lí Ebhe akódho 'ngú gba okpála lie-o. Yi mbila la me, aní akpó lita nakodho 'ngú ango-o lí okpála gba e makpe. I du la mo-o, bhende gba okpála inde ngayala naziba Bádha Ngali gba Ebhe-e adú la íbili naae lele pí? <sup>18</sup> U aye bhú Bhuku gba Ebhe-e me:

«I du me da nakobho ka okpála inde ngbingbili-e nde kpekpeke-e,  
engú bhe gba okpála inde ngayala Ebhe, inde la di ngamene siti 'ngú-o,

adú la íbili lele pí?†»

<sup>19</sup> Kaka-a, okpála bhende ngadje líkabhu anga Ebhe aziba mo-o, nu ne namene bádha 'ngú ne kalanu. U 'o la di lío makpe sakpa kpála inde abho ní, inde amemene 'ngú maka aní apa líe-o.

## 5

*A ayo nalila okandøø* gba Ebhe-e malila

<sup>1</sup> Ma ngagama 'ngú mbia inde-e pí okpála bhende bhú ká yi ne obhelesi okpála na Piga gba Ebhe-o . Ma di ne bhele kpála na Dadjua gba Ebhe maka uo. Ma au líkabhu lí Kilisito azu e ne djila ma. Ma asía la di té sangu gba Kilisito inde lí Ebhe asúno e pí ní-o. Kaka-a, ma ngayo ka yi me: <sup>2</sup> yi lila okpála inde lí Ebhe a'o o sakpa yi-e malila. Yi lila uo maka lí kpála nalila okandøø alilila okandøø gba e líe-o. Yi alíla uo ka napa de me u agbite yi tété ne kpéke-e de. Engú bini, yi lila uo ne bádha bua maka lí Ebhe akunda líe-o. Yi améne kulu ngubula nasia tia de, engú bini yi mene me yi nde abedhe ne mukunda bedhe. <sup>3</sup> Yi alíla okpála lí Ebhe a'o o sakpa yi-e de me yi nde ako angu yi pí uo mako-o de. Engú bini, yi mene me okpála kpata lele dasundu gba yi-o. <sup>4</sup> Lí yi mene mo-o, ekpí lí Yesu Kilisito inde ngalila ní-e agó líe-e, yi sía makalá na sangu ka aní. Makalá ango-o ngadu duduma ne duduma.

*Yi kø* líyi kala Ebhe ne kuto

<sup>5</sup> A bhadi moko pí yi omakombise, yi kø líyi ne kuto kala obhelesi okpála gba yi-o. Ma ngapa pí ndu yi omabhuka hana me, yi kø líyi ne kuto sunda yi. Yi teteke líyi sunda yi, padhá de, anga u aye bhú Bhuku gba Ebhe-e me: «Ebhe ngadji 'ngbu e lí obhulu 'ngbé 'ndji,

† 4:18 4:18 Tsia bhú Gbt. 11:31.

engú bini, aní ngaha bádha bhú 'bu pí okpála inde ngakø lio ne kuto.†»

<sup>6</sup> Kaka-a, ma ngapa pí yi me yi kø liyi ne kuto kala Ebhe inde ne angu, amba aní 'e'e yi ne abhúlá lí nedhinga aní akúnda lie-o. <sup>7</sup> Yi 'o ndu 'ngú hana inde ngato mbolo lí yi-e sakpa aní, anga aní ngalila yi.

<sup>8</sup> Yi dú bedhe, yi lila liyi, padhá de, anga djabulu bhulu yala gba ní-e ngadji bilí maka kingbi inde ngangulumba. Aní ngagili me ní azú da-ie. <sup>9</sup> Yi lu kala aní kpekpeke bhú nabhuka . Yi mbila ndjindji me omabhuka koko píla doto libhomu-o bhadi ngadje líkabhu maka yi. <sup>10</sup> Yi adjé nga matá líkabhu ngubula nedhinga bedi. Engú bini, Ebhe inde bhulu bádha bhú 'bu-o, a'i yi ngú nali bhú sangu na dúduma gba e bhú nakpøtsø liyi bhú dabilí ne Kilisito. Aní aléke yi ngae makpe, aní tsía méne me yi lu kpekpeke bhú ndu 'ngú hana má kpøkøbhø! <sup>11</sup> A ayo me aní u dúduma ne dúduma. A adu moko.

### *Oeli na soso*

<sup>12</sup> Silivano ateteke ma lí naye mbo ndu balua inde-e pí yi ngae. Ma ambila me a ko ndai ní makilisito inde ngamene 'ngú lí lelele. Ma aye balua inde-e ngubula nato masi bhú yi, di ne napa pí yi me a inde-e bádha bhú 'bu na kukulu gba Ebhe, yi gbite liyi tété.

<sup>13</sup> Omabhuka inde bhú Babilona\* ei, inde lí Ebhe abhu o maka aní abhu di yi lie-e, yi yi mayi. Ndili gba ma Maloko yi di yi mayi. <sup>14</sup> Yi yi liyi sunda yi, yi kama liyi sunda yi ngú nasuno me yi ne mukunda sunda yi. A ayo me guo 'ngú dú bhú dabilí bini ne yi okpála inde bhú 'bu Kilisito hana.

† 5:5 5:5 Tsia bhú Gbt. 3:34. \* 5:13 5:13 Babilona: Okpála bhelé ngabhundja me lí bilí inde-e, a akúnda nasuno gudhu na Loma .

## Gandja na Mbia

### Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c